

四庫全書

集部

欽定四庫全書

集部

羽庭集卷二

詳校官編修

臣范來宗

中書

臣

劉源溥覆勘

謄錄監生

臣程廷璋

謄錄監生

臣嚴續曾

欽定四庫全書

集部五

提要

羽庭集六卷

別集類四元

臣等謹案羽庭集六卷元劉仁本撰本字德元天台人以進士乙科歷官温州路總管江浙行省左右司郎中時方國珍據有溫台諸郡招延士大夫仁本入其幕中參預謀議國珍歲治海舟輸江淮之粟於大都仁本實司

其事其所署者郎官蓋卽元所授故集中諸
作大都感慨阡危眷懷王室其從國珍蓋欲
借其力以有爲徐圖興復亦如羅隱之仕吳
越實心不忘唐觀其贈李員外自集慶回河
南詩云漢兵早已定中華孫述猶鳴井底蛙
於明祖顯然指斥其志可知厥後國珍兵敗
仁本就擒抗節不撓至鞭背潰爛而死則仁
本終始元人未嘗一日入明永樂大典題曰

國朝劉仁本非其實也仁本學問淹雅工於吟詠多與趙倬謝理朱右等倡和嘗治兵餘姚作雩詠亭於龍泉左麓彷彿蘭亭景物集一時文士修禊賦詩自為之序其文雖不見於集中而石刻今日猶存文采風流可以想見故所作皆清雋絕俗不染塵氛其序記諸篇述方國珍與察罕通使及歲漕大都諸事多記所不載亦可補史闕原本久佚謹就永

樂大典所載以類編次釐為詩四卷文二卷
仍改題曰元劉仁本以存真焉乾隆四十六
年九月恭校上

總纂官臣紀昀臣陸錫熊臣孫士毅

總校官臣陸費墀

原序

天台之山下盡東海者曰黃巖其別峯走曠原而秀者
曰委羽委羽山之人有曰劉德玄者頎然而清黥然而
玄飄然有遺世之念自壯時愛讀揚子書所為文往往
有類而或過之後涉艱棘履險阨而作又益進其雄篇
也浩浩焉不可端倪其小章也幽幽焉又不可破裂噫
非玄微之理存於心其所發者能如是歟余嘗即其人
與之語矣因疑其山川之氣清淑者盡萃其身而又能

養之全守之固而益充故其山立而水行雲興而霆擊
星辰之布列雨露霜雪之滋悴鬼神之冥顯人物之昭
煥有若天地之所以化生萬彙而非人力之可及文之
玄果若是否乎玄之理在其身有非他人之測識者或
謂揚子雲行有所不逮然其文又非後進所能擬是則
所著太玄經果玄乎果非玄乎德玄果知之乎余豈得
而議之今輯所為文號曰亦玄孰曰不可不然後世有
劉德玄者必好之矣軒轅彌明自衡山來愛其文也故

馮物而序之重為歌曰悠悠太虛孰可馮我欲馮之氣
所乘坎壈窒盤紛不成精明純白道自寧天台半落黃
山青山中老人劉羽庭吟詩作賦如建瓴軒轅道士來
相迎袖中出我亦玄經起伏萬狀不得名為歌此曲山
月明宋無逸序

--	--	--	--	--	--	--	--

自序

至正癸卯之冬十月余被戎事過上虞主胡師德氏有
柳生泰者謁求柳莊詩遂口占授之既而朱君伯賢曰
生能致鬼神為文詞多奇詭即挾入密室請賦白雲巢
篇余方與客詹國器陳惟敬劉坦之僧震雷隱昱大明
及胡生璉立談頃伯賢亟出曰若有降靈馮于物者自
稱為韓愈氏即軒轅彌明書諸几曰聞羽庭公能文章
敢請見教邀余及衆客入室余辭以無與似者大明取

余近製守拙齋記一篇質諸神神使誦之若有聽焉既終誦乃書曰善則善矣獨中間熙字誤此吾淮西碑中語也當作嬉衆皆驚愕又書曰羽庭公近著亦玄集吾請為之序可乎凝神入思頃刻附筆立就辭語絕類韓子體製因憶向在庚子正月間夢偕士友論文俄而見巍冠博帶者馮虛陟降謂余曰吾昌黎韓愈也授以片楮楮中有云文以載道道有顯晦文亦為之低昂道在日用間文貴平暢則道自然明白文猶製衣也挈其領

而禡之理斯順矣覺而記憶嘗以語卓君習之宋君無
逸今序中乃曰吾嘗即其人而語之矣斯言似有脗合
乎前者噫蘇文忠公作昌黎潮州廟碑謂公之神在天
下如水之在地中無所往而不在又謂不依形而立不
恃力而行不待生而存不隨死而亡者誠哉言也豈余
亦嘗信之深思之至焄蒿悽愴若或見之邪故不得遺
置輒錄諸編左以備觀覽幸毋訝其迂誕焉是年月既
望天台劉仁本書

欽定四庫全書

羽庭集卷一

元 劉仁本 撰

四言詩

五雲為括蒼王叔雨賦也叔雨擬托於雲避地
上虞之五郭作雲溪雲堵雲居雲松雲路以自
娛為之賦焉

白雲緊緊于彼澗溪載興載揚為虹為霓為膏為液有
淪萋萋樂只君子迹其天倪

白雲滑滑于彼洲渚其流如脂其湛如水或霈而泄或
窪而澍樂只君子思其霖雨

白雲徐徐鬱彼蓬居以攬以結以卷以舒孰為之構自
我庭除君子戾止其樂只且

白雲溶溶施於長松長松千尺矯如蒼龍白鳥鶴鶴載
蜚載翬君子戾止灑然清風

白雲楚楚覆于行路如軒如坻如迎如遡迺息迺怡靡
或馳騫君子戾止其美無度

五雲五章章八句

五雲美韓也韓祖魏國忠獻王登宋天聖第唱
名時太史奏日下五色雲現蓋令德之符也既
南渡後嗣孫徙居越上五雲里者祕閣左司公
有作五雲次舊聞詢齋先生有五雲續舊聞莊
節先生有五雲漫藁十世孫諤力學制行扁其
藏書之室曰五雲書而其號五色生昭不忘其
祖也前翰林侍講金華黃公潛傳其事嗚呼豈

五雲之瑞與韓氏相為終始歟故作詩美之

猗歟卿雲五色氤氲兆為禎祥天作人文頎頎魏國令
譽令聞既魁多士克相大君以踐台鼎以樹元勲雲施
為澤澤垂後昆

世祈南遷自相徂越五色宅里相攸奕葉如雲斯興奮
乎莫遏如火既然如泉既達禮樂冠裳光華炳越宜其
子孫克篤前烈

卿雲五色于日之下作其休徵以篤韓祐頎頎魏國在

帝之所出將入相文武吉甫有子有孫繩其祖武謬也
雲仍其儀楚楚庶幾詩書以永韓祚

五雲三章二章章十二句一章章十四句

俞節婦

原註猗嗟孝節也句稽俞婦聞氏女
勵節克孝人皆賢之故作是詩也

猗嗟賢女來嬪于俞克遵婦道重罹厥辜既喪爾男復
殞爾夫乳子在哺孰相爾孤嫠嫠以樹堅志弗渝績紡
自給養終而姑

猗嗟賢女歸為俞婦既失所天伶仃孤苦刻志養姑弗

堪其窶父母欲奪誓則弗許引刀截髮號泣以詛天地
鬼神胡寧弗顧

猗嗟賢婦節孝獨貞姑嬰未疾復翳于盲吮腫舐睫視
為之明既其令終喪弗克塋褰裳偃僂負土以營悲號
哀籲風雨晦冥

猗嗟賢婦克殫節孝懿德令儀是則是效昊天孔昭爰
食其報宜其子孫宜其壽考鬱鬱勾稽雙桓具表我歌
匪溢式勵風教

猗嗟四章章十二句

湖田閔上虞也田利於湖水而或奪於豪右民甚病焉故作詩以閔之也

漠漠湖田瀕于海塽為畝為畝湖水漣漣以溉以灌稼穡閔閔弗溺于滯弗曠于乾

湖水綿綿歲取百千藝我沃壤粒爾艱鮮誰其作者手足胝胼致力溝洫禹無間然

維田於於受水於湖計水之利亦入其租其租伊何受

田之家既利其利迺輸其估官弗民病多黍多稌

湖水鋪鋪或堙或蕪弗治弗疏深溝為塗弗剪弗鉏有
荷與蒲彼豪者徒固利以圖謂湖可畚官輸是誣迺泄
其瀦以藝其淤胶我膏腴以害我農夫衆迺弗怒彼有
餘辜

我疆我場我田我穡繫湖之水實利之食樂歲狼戾伊
帝之力蒼蒼者天去此蚤蜚俾浸常淫彼紋田殖深我
溝洫滋我黍稷豈弟君子俾民弗慝後來其詢視于版

籍

湖田五章二章章八句一章十句

石

他山之石既堅以貞既攻既錯于以成城迺疆迺理經始營營萬夫皆作百堵率興以築以登弗怠于程

謂城蓋高如陵如臯莫堅匪石莫深匪壕集我畚杵聽我伐鼙民亦來只不敢以告勞

昔我先王有馮有翼作我藩垣保我疆場後來弗修恃

險蔑德威非不高孰為堅壁

維城連連維守迺堅守或匪良式戾于愆或據以叛或擅而專或降于敵或棄以捐化為豺狼風雨變遷

民維邦本先哲有言維此屏翰惠我黎元宗子維藩大夫維垣式遏亂虐以克完完他山之石永矢弗諼

石五章一章十句二章章八句三章章十句

題水木軒

維木有本維水有源水木假義以名我軒源清莫激本秀莫繁激

則潛逸繁則集喧止淵茂植取逢其源南山心遠欲語忘言

五言古詩

寄許具瞻省郎

長松出古澗參天二千尺矯矯冰雪姿不為歲寒易女
蘿附其顛亦復借顏色一朝事斧斤剪伐由中直但願
成棟梁女蘿不足惜

臘底雪

歲未盡三日雪深二尺餘喜作明年瑞先占大有書去

年冬不雪今歲田無儲十室九懸罄空山拾橡咀橡咀
饑可療拾盡將何如所愁凍餓死不見明年糈

為朱伯言題卷

朝陽有異士曾造重華庭一鼓南風曲萬物為和平東
姬及漢晉秦楚無餘聲彼或怨以怒又或淫而傾素絃
不為理千載懷幽貞美哉昌黎伯掇拾風雅英欣然作
十操擬託周孔名辭情或微隱古意誰能徵抱琴適東
海迺遇鄒陽生廣操一絢繹援琴為我聽三嘆有遺音

始足擴其情天地既寥廓日月行清明夜忽夢聖哲吾
衰感精靈起謝抱琴士伐木何丁丁長揖出門去幽思
秋冥冥

次帥掾張惟彬見寄韻

吾友張公子形骸頗疎放長才鬱未展浩氣自清尚豈
無萬里心為謀三釜餉王良善徒御乃使驂騑踴猶能
範馳驅未信斯文喪念昔與子遊中心日傾向如何久
參商杳爾音書曠懷人天一方氣與孤雲盡明年上玉

階子當擁仙仗儻能貽好音庶慰吾心壯

賀金元素拜福建省叅政仍兼海道防禦

玄靈忽中激四起波瀾狂河源溢故道淮泗迺濫觴大
江汧西下瀾漫汎沅湘浙水注東溟安流稍不揚蒼生
思濟涉孰作巨川航金君將相材起身自文章時危多
武備帝命出禦防三年持節鉞四境民樂康回瀾屹屹
石心赤葵傾陽豚魚既孚信豺鱷俱遁藏喜今膺大拜
擢置居巖廊匪惟天意眷允愜民心望旌旗障海上照

耀閩南荒大厦圯將構瓊材須棟梁車攻能復古東姬
期載昌向來弭節地暉矚有餘光

次楊彥成見寄韻

東方有處女皎若冰霜潔十年無可人布衾冷於鐵萬
里君王心所思漢宮闕及今寡所諧猶自重名節肯逐
兒女妍幽閨夏清絕寧死不苟從從人有真訣君家好
弟兄磊落皆英傑蹇修莫致辭令人生肉熱三歎理瑤
琴寄調相思閣上有青山高下有孤鸞別

餞秘書卿貢玩齋于慈溪永樂寺分韻得壑字
牽舟泊洄渚飛觴坐林薄惜別起遐思涼飈散寥廓宦
鞅昔言邁朋簪久離索及茲稅塵轡清華登秘閣雲漢
倬昭回奎躔仰盤礴搔首發孤唱商聲激巖壑

適意為倪仲權作

我有琴一張我有酒一壺我有書一卷我有宅一區物
我兩相忘天地一蘧蒢吟咏乎情性緩步而舒徐今人
不我薄合與古人居登山時採茹臨淵或羨魚人生適

意耳須富貴何如

雜花林紫薇坡蓋靈源山十一詠之二也為住

山阜上人賦

靈源函丈地種種植羣葩燦若列瓊瑤明如鍊丹砂續
紛衆仙袂絢爛五色霞粉白與黛綠一一含春華為言
觀樹叟且復觀其花恍然色界天風雨成婆娑

贈章履祥入憲幕

幽蘭在空谷泉石生輝光春風茁其穎曉露滋其芳脩

名不自眩信美誰能忘移之古柏下足以怡風霜願持
君子操永佩騷人章回頭視衆草紛紛道路傍

七夕宴會分韻得人字

雙星會七夕芳筵瓜果陳長歌乞巧辭對酒娛嘉賓牛
箱既不服空飲河畔津女織不可被支機久沉淪徒以
智巧名役此愚拙人紛紛兒女輩詐僞日以臻寧知有
大巧淳樸還其真雙星竟無答我亦不汝嗔但見銀河
翻風雨橫秋是查查兩靈鵲屋角時來馴

次韻奉答柳洲陸德陽

柳洲有佳士襟度殊清豁文采鸞鵠俱履操冰霜若芝
蘭映玉樹封胡與羯末才名人共誇道義羣蒙覺時世
遭亂離行藏始蕭索坐歎扶搖鵬遂困蓬蒿雀海濱忽
解后羈懷慰寥寞伊昔薦南宮起身事文學王迹詩未
亡春秋謹書法禮樂字縱橫珠玉炫參錯波瀾振頽靡
銅鑄敦菲薄閭闔風雲會璇璣星斗泊披腹呈琅玕傾
心秉葵藿孰謂河漢表支機不可著五色雲錦章迴颺

竟飄落歸來坐賢宮教育資三樂文運夙艱危武流競
聞達健翮尚冥飛靈姿終聳壑未起東山臥且赴西湖
約楊柳曉風清蒲萄春水渼共君解塵纓長歌醉濯髮

題毛貞士傳

蒼蒼松柏操不為霜雪移矯矯君子行堅貞常自持功
名及富貴顛沛與流離小人患得失君子審處之美哉
毛士子淑慎爾威儀彬彬周太史傳實無靡辭願保歲
寒節允懷風雨思清飈激頽波永為衰世貽

贈四明胡古淵

胡生安定系胷中星斗羅手持一寸鐵琯琢千岷峨漢
經與秦繹草隸及篆蚪班班善模勒歷歷能紀掌風雲
挾河漢海岳騰蛟鼉九霄鸞鳳翥圭璧明瑳瑳六書盡
標本八法無舛訛往年在天府魏石蒼穹摩臣模播聖
德刻畫功居多今年歸海上四起紛干戈方叔一戾止
跼跼安鯨波弓刀錫辭誓帶礪同山河文儒載巨筆老
稚齊謳歌崢嶸事鐫鏤千載功不剝淋漓傳墨本觀者

填丘阿作詩美斯善愧爾黃庭鵝明年中興頌微子其
奈何

寄卓習之教授

天台接四明雪竇連丹丘神仙所窟宅雲樹相綢繆上
有雨白鶴千年結清幽不為鳳凰似不與凡鳥儔天風
忽引去一息三千秋雙雙整羽翮齊落南海頭兩鶴自
鼓舞朝夕鳴相酬一啄丹山頂一飲劒水流丹山彫瓊
樹劒水凝不收遙遙山水間燦爛雲霞浮兩鶴又相顧

誓言毋久留巢穴本同地出處良亦侔寧不返華表誰
能上揚州

遊餘姚靈源山明真寺詩

原註寺乃晉支遁講
道之所時主席昱大

明宋劉忠諫公四世孫也忠諫與吾生祖郭正
肅公同在言路論事為權臣所害故詩語及之

時遊謝安寺今來支遁家昔賢冠蓋地我亦隨行衙
旌照山谷甲帳浮煙霞峯巒濯秋水熒熒青蓮花燒香
開寶殿老衲持袈裟昔逢暑雨足百卉生秋華平川沃
禾稻原隰收桑麻雖當軍旅際民物安生涯甚愧二千

石田里無愁嗟夜涼開講席奇芬發天葩語及通家好
前修倚葦葭羣書在西閣萬竹森交加白雲繞牀下明
月來簷牙忘言煮春茗清思散幽遐安得洗兵甲共泛
靈源槎

西樓喜雨

并序

癸卯夏四月不雨實切雲霓之望遂有事於山川五
月三日始雨四日五日又雨於是領客會於西樓飲
酒賦詩志喜也會者凡八人咸謂屬茲艱危在逆旅

中硯田筆耕亦不能無望於獲焉於時雲氣敷落雨
聲連續竹檜森爽涼浮几席間似有秋意衆賓懌然
相與為樂歸功太空欲即坡仙名亭之意以名樓席
長陸君德陽謂余亦郡守也遂摘取韋蘄州詩八句
分為起語人各足成篇篇十二句復俾余序之詩如
左姓名附見余得起句俯飲一杯酒

俯飲一杯酒仰酌三日霖茲辰屬端陽候律生初陰枯
槁沐甘澍一滴當千金禾苗遂長疑卉木良蕭森匪暢

西樓樂實慰南畝心懷哉答靈貺永言託微吟

題昱大明主持明真寺行卷後

爾祖與我祖同居宋臺端清名照冰雪蒼天日月寒兒
孫百載後名保青氈完師今在林下我立當驚湍師能
振宗鐸我徒懷悲酸邂逅一相遇握手平生歡青燈讀
家傳山穀釘盂盤相期共努力先德殊未殫

送別友人

送客長松下松間一壺酒酒盡客當去踟躕重攜手念

我平生歡感我離索久豈無絃歌娛歲宴寡親友情深
語反短契合誼益厚居人戀舊鄉行子在遠道灼灼洛
陽花依依漢南柳昨日少年客今朝成老醜一心秉明
德離別何足取

過餘姚州謁嚴子陵故宅高節書院

昔年過桐江釣臺鬱千尺扁舟泊祠下高風不可涉歲
月忽飄零惆悵塵沙隔今來舜江上先生有遺宅林壑
見儀形草木含幽寂南山宰律高氣與秋旻逼尚有古

風煙睚眦漢物色雙桓高節表千古頽波激仰視客星
堂穹碑頌遺德懷賢拜衣冠愧我持鋒鏑落日照巖扉
涼飈洒芳席蟬聲散餘清孤雲斂微迹天象詎可窺乾
坤渺猶窄長歌雲山詩目送冥冥翼

和高灞雪經歷致仕韻

宛駒縱逸步豈為千里窮長鳴一振鬣閭闔生華風燦
燦黃金絡矯矯玉蒼龍乘駕穆天子周遊四海空瑤池
上仙去寧知八駿功爾亦謝弔牧飄飄載喬松房垣我

窟宅倏忽騰雲中

送內弟王仲祥掾史赴福建省

涼飈薄天際秋聲動羣蟄載酒出城來為子澆鬱悒子
著從事衫浩氣風雲集左手掛弧矢右手持決拾有懷
離別情肯為兒女泣駁骨服鹽車安能久羈馭萬里閩
南路天昏瘴烟濕我昔佐使者分曹行郡邑後來在藩
閫軍民久寧輯念此遭亂離吁嗟亦何及儻見黷宮叟
為我致長揖遺我珠玉篇珍藏猶什襲明月下閩關願

逐清光入

舟泊石門洞

孤舟一夜雨溪流漲三尺起來推短篷洒然好山色旭
日弄晴暉微雲斂殘迹修眉澹欲舒嬌鬟淨如拭巖華
亞高低幽禽互喧寂仙人石門洞捫蘿可緣陟蒼松雜
疎篁清泉漱白石野鶴從何來長鳴韻嘹唳是時秋氣
中天宇湛虛碧吾徒詩眼明從者行亦適涼月忽在林
客衣風露襲篙人苦相催前灘起鷓鴣

題東坡居士著屐圖

楚楚玉堂仙飄飄僊耳客羈孤萬里身誰當慰岑寂黎
家釀新篳相邀風雨夕麻條束縵袍竹笠行山屐歸來
載酒堂泥深步傾仄陶然天地間乃知謫非謫千載慕
風流落月見顏色徘徊仰斗牛高標不可陟

建寧芝山取陸羽泉煎茶次卓習之教授韻

建城南五里芝峯特清麗頗聞此山中有泉出雲際昔
逢老茶仙烹嘗殊品第寥寥百載下幽尋竟誰繼客從

三山來顧茲若神契清風忽我招脫巾坐林翳金芽芝
髓滑石鼎松風細一飲詩脾清再啜凡骨蛻清談各盡
歡悠悠成久憇何當起羽仙飄飄遠塵世

憶別二首

君行湘水頭妾在吳江尾君妾兩相望遙遙數千里音
書似投石歲月如流矢念妾初事君終身托生死豈期
負年少春風誤桃李遠浦雙鴛鴦齊飛墮秋水牆中牆
外花何日復連理抱琴不成彈掩面淚如雨

妾在吳江尾君行湘水頭君恩與妾意共此江水流別
時花未開落葉忽已秋秋風苦裂帛道路無重裘孤燈
與明月照影不照愁有書不堪寄那知沈與浮塵埃生
鐵鏡衣帶寬吳鉤努力君加飯妾身夫何憂

紫薇坡

我時居掖垣堂署多紫薇夜直坐花下明月涵清輝一
為風塵起遂與花相逢鐵衣過林樾霞佩在巖扉相逢
喜得得欲語情依依花能擇幽地我乃乘危機愧花作

招隱行當歌式微

自東嘉與周草庭縣尉同舟至括蒼詩以送之
拏舟上括蒼同載得良友秋日淨宇宙涼颺在林藪地
勢行漸高溪流緣下走潭影日月寒灘聲風雨驟篙師
拽短纜偃僂狀如狗險惡勿相角前呵後揮手來舟欲
挽前去者那肯後復有叩舷人得魚時貫柳青山為主
賓掛石還沽酒白鶴下青田啄以芝千畝仙班儻可尋
宦路亦何有君今去作尉小邑僅如斗况乃山水佳武

夷在其右梅福有古祠丹臺遺藥臼須君一問訊肯寄
刀圭否

石門飛瀑次鮮于伯機都事韻

歸然兩石峽連雲不能斷飛瀑忽中分千古作奇觀玉
龍蛻鬚鬣灝氣薄銀漢銀漢爛不收萬斛跳珠亂天宇
肅高寒候律踰秋半維舟石門下遂得飽清翫山中有
高人為我理焦爨焚香謝塵俗橫經列童冠山猿與野
鶴可聞不可喚平居懷謝樂我亦思張翰

六月四日宴倪仲權荷亭

涼颼起蘋末疎雨滋水花彤雲擁翠幃來駐山人家山
人領賓飲碧筒吸流霞清波蘸方席小屋如仙槎浮光
濕衣袂餘馨散幽遐鳴蜩咽古木竹影森交加坐久良
不厭樂意殊無涯因思越城下擾擾飛塵沙

戍婦吟四首

明月何皎皎白露湛為霜妾身未有託遊子天一方悲
風四邊來中夜起彷徨欲隨明月去懷哉不下堂

妾在父母家衣容常楚楚一朝無良媒嫁作征人婦征人遠戍邊勤勞日夜苦欲往復躊躇有言不出戶

夫君在邊戍妾身守孤幃欲往備紉櫛不如頻寄衣衣到恐遲遲不到妾不知欲知衣到無明年鴻鴈歸

將軍功未成持牛勞軍士將軍豈無家為妾語夫主勿為賤妾生寧為將軍死賤妾欲從之軍中無女子

七言古詩

董君諺軍功詩

龍媒神物筋擢奇落落不受黃金羈伯樂一顧價萬倍
乘雲獵霧從驅馳董生逸氣有如此管侯何術能泰之
千金購士未為寶人生莫樂新相知至元五稷秋八月
炎荒夜半盲風吹蠢爾無知梗治化結巢據穴何險巖
守臣邊吏不敢視貔貅百萬勞王師瘴癘潛消軍卒勇
矢石空遺寒暑移管侯忠貞昭白日金符玉節光陸離
一鼓作氣萬夫勇三軍制命傳節麾帳下豈無謀策士
董生指畫如摘髭凱歌捷奏獻俘馘膏澤大洗民瘡痍

柳營之江春水瀾磐石之陽瘦石隳我聞昌黎作司馬
隴西用爾平淮夷儒者胷中有兵甲奮忠肯為兒女癡
董生日夜讀古書小試寧無大設施浩歌長嘯風雨作
劍氣直上星斗垂丈夫會遇各有時為君歌此從軍詩

謁建上梨山廟

建安山水東南奇扶輿磅礴來武夷巨靈掣此崐崙秘
煙霞翠碧長淋漓夫何蜿蜒吐金景孤峯特立無與並
千崖萬壑爭獻技盡向梨山作藩屏梨山有廟廟有神

迺是皇唐之蓋臣英英國姓通帝籍字曰德新名曰頻
當時受命拜天子來向建州作刺史建州遠在天南荒
百萬蒼生寄生死刺史下車觀民風刺史下令則民從
道路謳歌閩越最詩書禮樂鄒魯同唐德距今幾百載
德在民心有遺愛生為邦侯死廟食水旱不逢無札厲
年深歲久事模糊祠人罔或識厥初強名爾回字爾度
嗟神之靈詎可誣只今王封又三禩新作王宮五雲起
氣馭掀騰上牛斗溪山秀麗撼風雨邦人鼓舞歌太平

石班鮓香來薦誠劔戟森巖擁遺像音容響答如平生
我亦瓣香謁靈祇對越英姿凜顏色摩挲兩眼看蒼石
但覺閃閃神光擲我聞古有烈丈夫磨牙決齒面裂膚
忠肝義胆相照燭光岳英靈何代無區區作吏謝神寵
百福是道祿是總稽首再拜心為悚梨岳之峰欲飛動
題鄂省知郎中母太夫人劉氏節行詩卷

女蘿託質青松樹半夜髯龍忽飛去庭闈霜月生高寒
碧蔓縈愁幾朝暮仙家種出忘憂華合有春工新雨露

幕中秋香渚蓮開山中黃鵠銜書來見說門楣表貞節
白雲遮斷江聲哀

為黃理問賦百牛圖

谷口山村百牛犢牧子羣來四十六蒼茫牝牡各意態
頭角崢嶸立如簇或行或齧或寢訛落日川原豐草綠
一羣遠自村南來一羣相隨過江北兩羣分隊復東西
角力參差忽成觸持鞭左右猛欲答欲答不答互毆遂
前呼後嘿亂不羣散漫陂陀走林麓老翁秉耒歸西疇

畊遍一犁春雨足啄瘡鵠鵒背上行四五飢鳥下枯木
爾牛一一耳俱濕爾牧徜徉樂蕃畜不作南山白石歌
雨笠烟蓑自擲沐席地或茵坐鬪草捲桐為角橫吹竹
輕竿小網出蹄涔亂拾薪蒸在腰束榮名利祿了無關
差科不競歲年熟何人筆力回萬牛斑特烏健動盈幅
憶昔龍眠善畫馬人言後當生馬腹我今觀此考牧圖
嵩骨已朽誰能贖邇來草木暗風塵坐歎十牛紛九牧
四郊搏醬豺虎多蕃庶一時成殼棘赤地千里無蓄畬

勛革歸官喂飢肉安得問津河畔人織女支機同杼軸
復見周宣九十孳昇平大放桃林牯先生玩圖萬山底
便好歸畊坐茅屋曉日神光射牛背遮莫辛勤掛書讀

贈瞽僧通月海

天上有眼秋月明下照海水神光清海水明月萬古情
盡使品類涵羣形天台絕頂有老僧曾泄天機天所憎
天令怪物蝕其精老僧迺以月海名古來瞽矇心則靈
師曠有耳通五聲人生三十骨骼成舉手一觸分枯榮

禍福歷歷皆可憑高談霏屑鬼神驚昨夜策杖來叩局
為言我骨多峻稜我言師語他日謦請師持此來余徵

上虞大禹峯夏蓋湖山寺分韻得楚字

我條秉飈帝之所謫向滄洲采芳杜水田萬頃夏蓋峯
茫茫禹迹靈鼇負金仙赤脚開寶坊倒影玻瓈濕窗戶
玉壺下浸馮夷宮瑤光上掣璇璣府闌干十二銀闕通
日月煙霞互吞吐瓊枝琪樹凋秋霜赤壁丹崖墮玄圃
夜半潮聲風雨來老蟾捧腹魚龍舞我時一葉青蓮舟

雲從羣仙盡翹楚紅塵隔斷人間世手挹天杓酌清醑
醉登絕頂叫虞舜神禹之功垂萬古

野渡舟橫

青洲渡頭舟自橫浪花帶雨春潮生竟日潮生復潮落
沒泥青草無人行向來此路當通道行人喚渡爭先到
只今鯨鯢浪拍天無復行人有飛鳥

送委羽道士北遊

奉林昔沼空明山靈光夜夜飛寶丹丹成白日上天去

時聞笙鶴來人間師今別我竟何往真仙窟宅窮躋攀
東掠扶桑繫海水西登崑崙歛天關玉泉儻許借辭色
為言鬼蜮尤肆姦上界仙曹足官府胡我所治多荆管
願得劍光斗牛下一洗東南民物艱政恐依然隔風雨
碧桃千樹春闌珊

送阮止善提點福州紫極宮

我昔騎鯨度南海直上三山躡煙藹珠宮貝闕開參差
玉荔瓊枝動光彩紫極真人坐瑤壇玄精百鍊成寶丹

帝勅天丁為呵護金輪黑幟猛虎踰鬼域潛形不敢奸
瀛波跼跼無狂瀾真人去後遺劒冠石壁丹臺風露寒
君今談玄得真訣麾叱雷霆下金闕三神之君持絳節
久待滄洲弄明月

桂山見月

青洲桂樹何團團樹頭明月不可攀嫦娥揭弄山河影
乞與人間之廣寒白兔細傳長生藥香飛屑屑金華落
主人折桂月中歸月中桂子誰能斫

梅澗寒冰

青州古澗凝寒冰上有老樹盤稜層玉壺明月印疎影
乃知梅與冰爭清迥然孤標出萬壑凌室寒光照東閣
欲攜紙帳澗底眠餐水啖梅兩不惡

隔林僧梵

青洲洲外梵王宮映牕海日搖青紅門前潮汐自來往
隔林煙靄聞疎鐘鐘聲喚起漁人夢海上風塵方瀕洞
輸與山僧入定還龍女時來獻清供

次韻琴鶴歎

練朱疏越忘遺音
睢鳩鳴鳳成陸沉
離鷺別鵠聲哇淫
雜嘈非瑟還非琴
牧犢感此朝飛禽
何人賈街白首吟
漢宮女子恩怨深
悲來乃售詞客金
蘋繁王化行周南
變風一作傷人心

懷哉令威遼海東
一去不返城郭空
朝陽五彩遺孤桐
雲天邈邈飛冥鴻
陽侯吐氣乘毒龍
旄頭吮血流為虹
華亭煙雨悲秋蓬
淒然嘹唳將安從
飲啄不下空明宮

羽衣何日能相逢

少年行

城中美少年十萬當腰纏朝擁紅姬醉莫入花市眠青
春事游俠白日行神仙豪奢侈靡競誇詫千金之裘五
花馬明珠的礫珊瑚赭錦囊翠被薰蘭麝生來富貴無
與倫豈知耕稼識艱辛一朝世變起風塵少年嬌脆無
容身城外惡少年膂力如虎健令人出胯下靡豪逞精
悍舞刀持槍乘世亂掉臂橫行遮里閑剽掠人貨為己

卷一
券昔無擔石今百萬結黨樹羣肆欺誕闕室憑陵何所
憚一朝黃霧肅清颺大官正法施王條隕突追呼行叫
囂少年浪跡無遁逃鉗鎚束縛首為梟鞭流腥血尸市
朝我作歌歌年少毋為美誇毋惡暴我作歌歌少年夜
讀古書朝力田作善降祥天則然生當亂世終得全

四明車廐驛世傳為秦皇求仙巡遊駐蹕之所
秦皇詐術愚天下好誕反為人所愚萬乘既尊天子位
九重即是神仙居茫茫采藥馳男女歷歷祈神封禪書

海上蓬萊果何處山河回首成丘墟後來漢家第五葉
露盤通天亦可吁祈天永命別有道長年當效唐與虞

竹塢清風

青洲種竹千萬竿翠葆常生六月寒日色微籠金影碎
風聲戛戛青琅玕疎為三逕密為塢此君何用侯萬戶
可是故人期不來我獨悠然造竹所

登福州鼓山方巖寺詩

原註寺在河口又名涌泉上有七曲亭晦庵先

生舊讀書地也

方巔方巔萬山頂佛窟深藏白雲靜天台有客愛看山
摩挲蒼翠踏雲影一曲初上乘雲亭乘雲便覺毛骨輕
山花迎客山禽語同行亦有三兩僧二曲孤亭半山立
獨松偃蹇蒼龍蟄亭前石塔古佛刻巖花蓊蓊苔蘚碧
坡陀三曲勢欲平憑欄一望心眼明長江映帶出其左
孤巒湧躍如渴鯨峯回四曲勢危陡下瞰城闌僅如斗
風帆沙鳥江上來盤屈長蛇又其右有亭五曲如騎龍
翼然兩角爭為雄孤高峭立衆山上金榜重標第一峯

六曲七曲天咫尺石門參井皆可立崇墉繚繞入深閨
重玄寶閣揭飛錫中峯後擁如天幢左之右之萬陣降
浮圖百尺扶漢起玲瓏八面鳳鳴缸老僧一一為余語
香霏翠蕩天花雨靈源洞口雲氣深欲聞石鼓呼山鬼
山鬼不應鼓不鳴寒崖空寫喝泉名當年一喝有何異
至今不聽潺湲聲雨亭坐對忘歸石石屋臨滄接東極
天風海濤孰揮灑迺是紫陽真人之遺蹟我今乘興來
登臨尋幽索怪成孤吟却憶十年夢中到一聲長嘯開

煩襟興闌步月出前林回首白雲深復深

將南歸

桃花流水碧潺潺劉郎誤入天台山玉簫吹斷丹霞夢
回首塵霧非人間乘鸞却向武夷頂手攀明月弄清影
何人苦斫丹桂花萬丈金光落銀井剴然長嘯天地秋
天風吹送三神丘真仙笑贈芙蓉瑛白日翱翔南海頭
海若揚塵海水立焦然斥鹵青煙濕蒼生願得秋雨涼
却嫌珠碎蛟人泣飄然拂劍來東吳葛洪鼎溢流成湖

翩翩紫鳳在何許空山凡卉皆焦枯滿目黃埃不可住
翻身又入三山去荔子丹燒火齊紅瓊田萬頃芝堪茹
絳衣仙子彈金徽把翫琪花待我歸珠宮貝闕芳菲菲
胡不返兮將疇依裁雲為佩風為騑吾將去矣聊以明
吾幾

題會溪圖贈胡仲玉

四明山高水發源七十二曲流奉川幽人結屋會溪上
千巖萬壑多風煙派分自是安定系薄宦因家二百年

子孫讀書尚文彩鐵筆代畊無石田去年海上逢古困
天府璠璣多鏤鐫今年相見有仲玉叔侄古意俱蒼然
青燈夜雨看石刻姓名世上同流傳只今戍壘填郊原
文章圖史誰復言落日放船會溪上山水窈深聊考槃
武戲文定垂不刊行當與君撫噴坑

白雲篇七首

芙蓉花開隔秋渚白雲孤飛度江水江水長帶落花香
我心逐逐雲飛揚

山中白雲不出山山外白雲招不還雲亦何心異出處
我獨傷悲淚如雨

鷄聲喔喔號風雨布衾寒氈冷如水我興不昧聽鷄聲
鷄聲漸歇風雨晴樓頭鴈過殘月明

曉鶯飛上春風枝學語未成兩小雛我思歸兮夢千里
隔窗何人弄機杼

空明山色浮丹丘美人結桂山之幽簾弄煙霞鍊方石
我欲從之歸未得長憶明空好山色

光風和月蘭生芽茁茁擬作明年花花有清香三萬斛
我有寸心耿幽獨相思欲奏猗蘭曲彼美人兮在空谷
曛曛曉日山色蒼起來覓鏡如明霜有懷不語對鸚鵡
君不來兮君馬黃

琵琶曲

冰絲雪練紫檀槽大槽急切小嘈嘈帳下小番齊拍手
越姬馬上醉葡萄我聞此曲何人度曲中有女將誰訴
一聲似說漢明妃一聲似恨商人婦琵琶琵琶且莫彈

齊竽楚瑟紛世間青草獨生孤塚上青衫何似淚潛潛

青洲

青洲野水瀦為塘塘頭高柳參成行漲痕過雨微風起
柳色淡弄鵝兒黃波明煙煖春意足大鱗小鱗遊岸曲
主人把釣成坐忘終日晴光泛蘋綠

田父吟

田家父作勞苦五更鷄鳴月當午呼兒鞭牛出蓬戶翻
犁南畝耕新土土沃泥深沒牛股田家父作勞苦朝櫛

風莫沐雨舉鍤成雲齊耦伍沾體塗足身僂偃村南村
北飛桑扈何如六月商羊舞田家父作勞苦有男在邊
負弓弩不得歸家築場圃今年年豐多黍稌大半供輸
入官府去年陳逋還未補田家父作勞苦如坻如京願
倉庾日殺羔羊祀田祖鷄豚社酒喧村鼓擊壤高歌祝
明主靜掃邊塵不用武但得年年太倉積紅腐我田作
勞不為苦

採桑婦

朝採桑向東陌露花盈盈桑葉白暮採桑向西阡鷄栖
已在桑樹顛苑彼柔桑採不盈筐高枝仰攀難入手低
枝屈曲勾衣裳阿婆家中望葉歸蠶飢葉少歸來遲蠶
成織絹作征衣征衣寄與塞上兒昨夜大兒寄書至書
中點滴關山淚去年山東置老營今年又離山東去河
北河南盡戰塵此身生死知何處採桑採得桑已枯蠶
繭未成來索逋當門下馬意氣麤滿橐黃金呼阿奴使
君得非是秋胡使君自有家中婦妾身豈必秦羅敷妾

身自有塞上夫使君莫狂呼男兒當遠圖我願四海罷
兵民力甦年年採桑養蠶供稅租

賦賞心亭送李止敬

酌美酒賞心亭山川古形勝江左誇金陵鳳凰不飲啄
草木皆彫零晉代衣冠久岑寂謝家庭院多鈴璆不聞
玲瓏響玉樹但見霜臺老拍摩空青酌美酒賞心亭寒
煙亂荒草落日明疎櫺酒酣雨耳熱浩歌醉未醒醉未
醒浩歌為我呼寧馨

蕨其行

原註閩清縣饑不報民采蕨
其為食而多死者作蕨其行

東山有蕨其南山無蕨其西山有蕨其北山無蕨其采
采蕨其晨露未晞荆棘離披筐筥攜持長饒深入土短
褐寒風吹采采蕨其可以療飢以簋以炊為錫為飴食
少不下嚙食多傷人脾去年歲歉食無糜橡栗拾盡民
流離今年歲歉田無稗蕨其食盡將安之美食太官饌
仁心寧汝悲但見昨日奏麥兩岐今日進五色芝呈祥
獻瑞無休時載膏載脂驛騎驅馳蕨其蕨其官獨不汝

知已而已而歲云暮矣

送林宗明調廣東掾

君不見元龍老去氣尚豪醉卧百尺危樓高又不見淵
明不為米折腰安肯束帶迎兒曹節槩由來重山嶽功
名迺或輕鴻毛薦書期會相迫促吁嗟州縣人徒勞南
山白雲不可招東海黃塵浩莫逃安得攀馭明月乘清
飈與君八極同遊遨

四明行寄臨海尹張惟彬

君不見四明佳氣長鬱葱層巒疊嶂摩蒼穹上有四窗
鑿靈竅空濛杳靄開玲瓏丹山赤水洞天在淋漓紺碧
雲霞重海上鯨鯢矗樓觀風煙有路蓬萊通劉樊夫婦
上昇處至今絕頂丹臺崇火輪東出扶桑谷嵒砢下走
祥雲封蜿蜿蜿蜒獲福池滄波浸碧環鄮峯千秋琳館
知章宅十洲島嶼真隱宮飈車鶴馭羣仙下珠璫玉珮
聲磨礧乘槎遂有張公子丰標眉宇真喬松黃石素書
非草草霓旌絳節行幢幢大府雄藩重然諾徘徊翠幙

依芙蓉袖裏如椽五色筆文章煥爛流白虹紫電清霜
補玄化瓊芝瑤草回春醲簸弄日月兩湖水珊瑚倒影
搖青紅我來逢人說斯善麈談疊疊生華風憶從東髮
共交結遺編硯席朝暮同芸窗雪案久磨琢蟾宮桂殿
期相逢一朝寰海起黃霧人間蹤跡如飄蓬九年青山
落君手我亦獨走閩嶠東二十餘年泛萍梗新豐歲月
何忽忽歸來相看各老大未許試劒誇英雄豈知四野
急烽火置身還自居兵戎玉帳分弓嚴虎旅燃犀照海

驅蛟龍丈夫遭時各有異莫嗟文事趨武功君人作縣
在鄉里勸課猶得隨桑農賣劍有人曾買犢讀書興學
如文翁嗟我去年忝郡守逗留五馬將遊從池塘春草
歸未得依然長劍倚崆峒懷人千里共明月昨夜書來
猶夢中贈遺使我顏色好花帽細穿魚子梭瓊瑰乏報
沈吟久作詩聊附南征鴻

[illegible]

欽定四庫全書

羽庭集卷二

元 劉仁本 撰

五言律詩

王生軍功得官監稅

大帥開戎幕王生試六韜檄書連夜發劒氣倚秋高譚
笑收羣醜才名壓衆曹如何受官賞只任繭絲勞

問竹軒為禪寂寺一元上人賦

試問高安信風煙近若何深林無客到地隱此君多鸞

鳳時能下琅玕淨可摩老僧方止觀明月自婆娑

黃節婦

原註黃謙妻董氏歸十日而夫死有庶子寡居四十年竟不得有司之旌表

石竇空流水閭川莫問津為君十日婦誓我百年身庶孽存宗祀閨門重睦婣却憐旌異者多是貴豪人

閨情

昨夜窻前月西風下井梧夢魂關塞隔燈影枕衾孤淚落啼蜚急衣成過鴈無將軍功未就何日佩金符

王烈婦

原註王揆曾為潘王府教授死京師妻董氏聞訃即引刀自刎不食數日亦死

夫子王宮教音書遠莫聞日邊俄報訃地下即從君石
竇猿哀壑燕山鴈沒雲旌書來萬里合葬表雙墳

靈源寺藏書西閣為阜上人賦

松竹林邊寺西山爽氣浮昔開千佛閣今見萬書樓老
墨明宗旨研朱自校讎本來無一字寧羨鄴家侯

東湖

一帶山如畫東連百頃湖水腥龍吐氣月瑩蚌含珠畎
澮浮香稻漚波沒短蒲漁人撐小艇來往疾如鳧

倚杖東湖上行人鷗鷺邊幾番風雨度一曲水雲連勝
槩多山寺膏腴賸稻田芙蓉涵倒影蕩漾採菱船

訪紫籜寺致上人

不憚青尖路來尋紫籜師十年曾記別一夜話相思木
井泉甘處槎山茗長時月明誰入定門外鶴歸遲

題清暉軒

湖上軒亭好幽深淨可依欄楹涵倒影風日漾清暉濯
濯蓮如水娟娟竹近扉紅塵渾不到坐客亦忘歸

茶洋驛次王伯宏韻

晚泊茶洋驛塵勞暫解紛龍光騰劍氣鳥跡印沙文
憩席沾疎雨回帆沒斷雲故人為使客聲息偶相聞

四明涵虛驛

涵虛湖上館賀監舊亭池明月浮金水微風動綠漪
雲林殊不遠煙雨更相宜欲解塵纓濯慚持使者麾

中巖寺

城中山作寺山外水為城未得逢僧話先聞啼鳥聲
溪

雲將雨過竹寬度泉鳴自愧塵纓縛空勞野鶴迎

龍井寺禱雨詩二首

天井龍三窟危峯翠一拳化身分蜥蜴噓氣出雲煙水
積他山堰田登大有年今當赫靈異霽霈蒼精虔

攀蘿行鳥道絕壑見龍湫嵐氣千峯雨溪風六月秋冷

泉移別井古寺翳深丘獨愛他山下梅梁積水浮

原註
梅梁

事吳孫權伐四明山之大梅為棟梁折為三一沉
他山堰下一越上大禹廟一在餘姚之燭溪湖

建上玉清洞天

道士期相訪玉清僊洞閒鶴飛雙闕下人在五雲間細
火薰沉水香風裊博山大丹知有訣九轉始成還

昌國道上

經行昌國道熟路問漁家山色遥連海潮痕淺沒沙畬
田香穠極野水淨蒹葭馬首斜陽下投林數點鴉

宮怨

無復羊車至空憐鸞鏡悲君恩新寵妬妾貌舊時衰宮
樹西風急御溝流水遲起來拾紅葉欲寫恨無詩

題寧溪王氏清隱

頗愛寧谿上羣峰玉雪明三槐無別隱萬竹有餘清
漁父還忘世滄浪可濯纓塵沙方眯目幽事獨關情

自東嘉別劉谷瑞照磨偕周縣尉同舟上括蒼
訪舊東甌驛維舟傍柳陰孤城當斗口兩塔湧江心
奈負參謀醉偶同僊尉吟括蒼何處是西望白雲深

送別友人

携手河梁上杯行酒莫停雨花天際白岸草渡頭青
別

意隨流水孤蹤憶泛萍功名須早就休待鬢毛星

留別卓習之

有客欲登舟將歸南海頭白雲頻入夢黃葉漫繁愁月
落鷄聲曉江空鴈影秋題詩聊記別感子意相留

次項伯溫留別二首

蚤年同硯席如子更何人為客江湖久相親風雨頻有
懷空著述無問及經綸漢制威儀在中興日月新

二十餘年舊重逢屬亂離鶯啼幽谷好花發上林遲君

豈依劉表人還說項斯依然京國去獻納正當時

贈潛德處士

舉世趨榮進君能獨隱潛利名雙轉轂風雨一掀髯書
卷酣黃嬾琴床夢黑甜封侯託兵革談笑出閭閻

七言律詩

敏上人為廣明山叟求詩

廣明山叟雪盈顛獨住山中八十年一畝舊宮深竹裏
半溪流水落花前每携賓客從詩酒更喜兒孫事簡編

杖錫有僧來約我欲修淨社共栽蓮

元夕飲客前一日立春雷震于地

土牛鞭罷看張燈一夜東風轉玉繩
出地雷聲先奮豫發春陽氣喜同升
辛盤綵勝宜行酒甲圻勾芒已泮冰
漸覺四邊烽火息五雲深處望觚稜

甘露寺詩

原註逢龍則止落石則歸唐詩開山
場禪師公案也改名龍山甘露寺

玲瓏樓閣翠成圍落石逢龍事已非
江月長隨潮上下林巒時見雨霏微
雲厨甘露分僧供茶竈青煙喚鶴歸

欲鎮山門無玉帶臨岐惜別解留衣

壬寅正旦大雪

鼓角旌旗啓禁扉玉階拜舞引朱衣九天祥瑞呈三白
萬國文明御六飛世運中興皇極泰職方重慶版圖歸
小臣叨牧居東海遠祝華封達帝畿

過上虞西溪湖二首

千頃湖田百頃陂波光山色水相依蒼煙釣艇漁歌起
野水人家燕子飛培塿蛇涎青不斷池塘楊柳綠成圍

數聲牧笛雙溪外
熟路牛羊下夕暉

湖田漠漠上虞鄉
葑蕀陂塍復舊疆
九十九溝春水滿
一重一掩岸花香
山禽布穀催東作
泥馬移秧過別莊
慚愧省耕非我地
遲歸猶坐野人航

過楓亭驛和周草庭巡檢韻就寄

餽糧千里又南征
笑把弓刀擁將星
汗血沙塵前後騎
檄書烽火短長亭
天連閩海團團白
山遶彭湖點點青
遙想環峯三十六
將軍晏坐對滄溟

挽鐵德剛防禦

生來磊落是奇男，死後身名無愧慚。
東海十年憂作疾，南柯一枕夢成酣。
干戈滿眼添惆悵，樽俎何人復笑談。
絮酒漫澆山下土，不堪愁思結晴嵐。

贈刑部尹侍郎自集慶回河南軍上

百萬王師屬指揮，江南在望隔淮淝。
斜陽慘淡烏衣巷，野水微茫黃鶴磯。
漫說六朝風雨恨，要令萬里版圖歸。
使君返棹經鄞海，聞外還期羽檄飛。

過靈峯寺

曲折青山路幾重又扶短策上靈峯此中元是三摩地
亂後新栽四萬松紅樹鳥啼知客到碧潭龍出有雲從
老僧求作石橋記指點瓶壺說舊蹤

梅邊詩意為徐架閣賦

坐對寒香獨撚髭乾坤清氣入詩脾沉吟鐵石肝腸語
題品冰霜雪月姿東閣水曹春興動西湖處士夜眠遲
眼前多少幽情思莫遣城頭畫角吹

遊上虞峨眉延壽寺

龍言服淮夷建節旄肅將王命保東郊軍無餘事尋幽勝
客有從遊多舊交竹外雲深僧結榻松陰露下鶴翻巢
興闌歸勒湖邊騎一路東風拂柳梢

挽江清可州判

蚤歲曾聞辟孝廉春風驥足漫成淹無家可住遭時亂
有子能知養日嚴一哭乾坤成倏忽千年泉壤閔幽潛
生芻一束來清奠腸斷梅花照海澹

司馬世榮寫神

絕憐司馬妙傳神
蚤歲聲名動搢紳
劍珮英雄趨虎豹
衣冠勲業上麒麟
杜陵老去丹心苦
彭澤歸來白髮新
好為衰容圖野服
秋風江上理絲綸

赴建上

武夷清氣接瑤臺
想見曾孫宴席開
九曲煙霞看未了
一舟風雨喜重來
滄洲水淨鷗盟遠
華表雲深鶴夢回
十二仙曹足官府
謫居猶得近蓬萊

上虞東山寺

試上東山望會稽
旌旗曉拂曙光開
東西二眺雲舒卷
大小兩江潮去來
遠水寒煙曹女廟
野花幽草越王臺
軍行我欲問籌略
太傅風流安在哉

謝傳東山幾百年
當時高臥豈其然
一朝宜為蒼生起
正朔猶還典午傳
對客圍碁談笑裏
敵人退舍計籌先
後來指授如公少
况復行師有石元

寄題雲松齋為潘子京賦

江上芙蓉五老青道人結屋倚修屏松陰時作翠蛟舞
雲氣忽如蒼狗形萬頃波濤秋浩浩雙飛笙鶴露泠泠
採薇童子歸來晚自汲清泉煮茯苓

題米元暉青山白雲卷

原註世之圖青山白雲者率尚高房山而又多

賈本殊不知房山蓋學米氏父子慈溪烏性善出此幅示余大不盈尺而有江山無窮意態聚畫史觀之審定為米家物也今房山不可得矣況其師者乎因題近體詩一首以歸之

元氣淋漓濕未晞何人曾次奪天機白雲兀突青山起

野水微茫綠樹肥落筆總誇高彥敬此圖還憶米元暉
數椽茅屋如親舍回首家鄉未得歸

贈兵部李員外自集慶回河南軍上

漢兵蚤已定中華孫述猶鳴井底蛙萬里山川明劒戟
十年草莽厭塵沙鳳凰臺上人回首牛斗星邊客問槎
會聽後庭歌一曲秦淮明月動清笳

漫興

自從流水出桃源便擬辭榮去學仙靖節居官八十日

令威化鶴三千年人民城郭還非是親戚琴書莫浪傳
青鳥不來花落盡又看風雨洗華鉛

算尖峯

尺五青天千仞尖雲鋪綠髮淨髮鬢唱籌計是量滄海
遺算拋來長翠藍列岫縱橫如畫一環峯左右似函三
我來欲問數奇耦太極仙翁睡正酣

松巖寺為秋月上人賦

前湫設險護山門石破天有線分洞口水簾含蚌淚

巖頭肉髻卷螺文玉虹貫夜如秋月蒼狗有時為白雲
松下老僧開半榻問余何日解塵氛

遊定海縣淨居寺詩

龍光蜃氣逼籃輿賓客陪從過淨居縣令相迎秋色裏
山僧出定午齋餘新羅杖錫唐時住天竺樓臺宋御書
池上白蓮堪把翫何須結社問匡廬

遊虎丘寺

弔古來登海湧峯吳王霸業有遺踪魚腸劒氣衝牛斗

虎穴金精說祖龍
弄影浮圖松竹合
點頭頑石蘚苔封
倦遊欲借前林宿
却厭寒山半夜鐘

送翁判官進青柑

揚州包貢類南琛
絳蠟封來色未深
先向天邊承雨露
肯同霜後出園林
雙旌使者獻方物
萬壽君王賜德音
何事山川苦修阻
梯航處處繫人心

六月同郡守禱雨育王山靈鰻井

為乞天瓢走謁龍
秉誠曾到育王宮
萬年舍利孤幢在

一脉靈泉九井通雲氣合來鰻出水雨聲隨至鳥呼風
應須三日甘霖遍太守同歸造物功

為前人題漁樵問答圖

畫師何意託樵漁山有扶蘓水有魚船尾漫垂公子釣
擔頭不掛買臣書一樽酬酢勞相問二老徜徉樂有餘
鼓枻爛柯人去後江山風雨獨愁予

送童士珍由翁洲書院山長調浙東憲掾考滿
昔從鄞海得奇逢弈弈衣冠禮樂雍春滿翁洲生杜若

霜飛憲幕採芙蓉盡言東浙觀風好却夢西湖歸興濃
別酒一盃歌一曲片帆江上掛雲峯

贈閩憲掾龔漢臣

昔年作吏三山上憲府戎藩兩地雄歲月無情催轉轂
塵沙滿目數飄蓬君今磊落為清掾我正興居問阿翁
烏石山頭霜月白長空萬里送歸鴻

送經略掾楊敬修之福建

關西夫子舊儒林萬里俄瞻使節臨世亂謹持三尺法

家傳不受四知金
鐔津劒化風雲
合幕府蓮開雨露深
會識草玄經
尚在後期問
字定相尋

送經略掾劉彥章之福建

宇宙風塵未息戈
君才不減漢蕭何
大江西去山川改
閩海南來瘴癘多
荔子枝頭紅錦雨
鷓鴣聲裏翠煙蘿
吾宗天祿遺光在
好藝青藜照太阿

三秀齋為寧海葉芝賦

原註芝宋丞相西澗公之後從盛熙明讀書鄞

上海

小僊築館近蓬萊九葉青芝秀色開紫蓋霞光浮玉宇
金莖露氣濕丹臺讀書還作人間瑞採藥曾從海上回
却愛靈源出西澗至今流水不生苔

咏梅

朔風一夜向船旗曉起江城望欲迷庾嶺橫斜花燦爛
羅浮清淺玉琉璃訪尋自可追詩叟吟詠難容讓謝姬
借問山中何所有瓊枝瑤草任相携

原註是日為友人
往山北尋梅為雪

所阻因折
一枝以寄

曹娥廟

渡口人家烽火摧渡頭古廟獨崔嵬半溪流水剡中出
一帶好山越上來烈女有碑鐫孝行智人商字較奇才
祠前賸有梅花在聊折清香薦露杯

中使和卓太御過浙西福建頒賜紫雲衣

原註
與福

建省觀孫
左丞同行

上尊侑賜紫雲衣中使傳宣出禁扉浙右織坊新製好
泉南番舶舊時非三千海水程何遠十萬糧儲貢不違

關陝兩軍休格關江淮有客在京畿

竹嶼詩

何年此地有雲巢水谷曾曾結構牢日莫玲瓏霏霧靄
月明蒼翠拂波濤坡陀冷浸琅玕影雨露寒濡鸞鳳毛
忽聽洞庭張樂響風煙短髮不禁搔

春日即事

元元萬彙總胚胎一夜春從天上來海底龍光射牛斗
空中蜃氣結樓臺仰瞻箕翼君王壽恢復山河將相材

輓漕小臣思報效東風便擬布帆開

題嚴次平畫金陵雪江圖

憶昔騎驢過落星西風朔雪滿金陵鵝黃酒熟當鑪店
淮白魚新水出曾僊佛樓臺銀結構鳳凰城闕翠模稜
十年不到塵沙暗展畫題詩感慨增

回軍別總兵官

書律元非戎馬材笑談偶拂瘴煙開三軍露布勞心盡
一夜霜花入鬢來映劒淋漓魑魅血濁醪浮泛觴醴杯

便將弓掛山前月笑折梅花領陣回

清華樵隱為丘理問賦

海上諸峯翠欲摩清華洞口結盤陀白雲滿地無人掃
明月吹笙有鶴過萬丈丹光浮沆瀣一天秋氣濕差莪
知君高致成樵隱不羨棋仙有爛柯

柳南小隱為汪以敬叅謀賦

楊柳湖頭手自栽柳南新築小亭臺絕憐張緒風流在
擬學陶潛歸去來燕子飛時花雨過鶯聲近處翠簾開

塵沙故里休惆悵且放春光入酒盃

五月九日過餘姚化安李碧溪宅

曉行喜色動林巒五馬聯翩出化安十里青山紆皂蓋
雙飛白鳥避金丸桑麻問俗科差少樽酒相親禮數寬
仙李深根新雨露傳家猶是舊衣冠

過鄞城北郭倪仲權居宅

城市山林爽氣佳衣冠世裔舊光華花香竹影三間屋
道脉書聲十乘家墓草成羣眠野鹿庭柯返哺有慈鴉

滿床袍笏承遺澤華萼聯輝蘭茁芽

王伯弘

王郎共我最情親萍梗曾同在七閩壯志已酬青檢芥
美髯今見白於銀思君海內多知己習隱山中更幾人
却愛子孫兄弟好團欒杯酒歲時新

己亥歲旦

元氣初回寶歷新臘殘一日已先春相臣經略江南事
民物瞻依天上人草木盡期濡雨露梅花獨不受風塵

太平基業當重見萬里丹心繫紫宸

上虞蘭芎山葛井

葛翁此地煉金丹丹井猶遺紫翠間山勢蜿蜒雙帶舞
江流盤曲兩弓彎漁歌樵唱相酬答沙鳥風帆自往還
謝傳獨憐西眺好不來松下一躋攀

寄月彥明中丞

瓊林燕罷玉堂僊玉閣春風十二年執法一星河漢表
靈槎八月斗牛邊手探禹穴圖書府人近蓬萊咫尺天

好布九重新雨露盡收江左舊山川

見南御史臺中丞月彥明

螭頭簪筆領羣才喜見祥鳥集鳳臺兄弟貂蟬聯萼棣
神仙樓閣出蓬萊星槎遠泛風濤穩霜簡還濡雨露來
總愛壺漿迎畫錦家山驛路早梅開

挽陳宅之

良醫自昔同良相用藥還如善用兵幾見春風躋壽域
忽驚昏霧隔蓬瀛幽光秘室金丹在陰德庭階玉樹明

聊寄寒梅成薄萼雲深海上鬱佳城

挽應仁原

應郎三釜為親謀蚤歲來從相府遊奉檄未能酬素志
獻書直欲取紅頭終軍纔入青油幙上帝俄成白玉樓
明月雙溪慈母淚江東雲樹故人愁

濮陽吳孟思挽章

趙吾篆隸丈人行去後專門羨濮陽千古鼎彝存款識
九天星斗煥文章玉樓夢赴緋衣召碧落書成白羽翔

有子遠來徵些語誰堪寫勒墓墟旁

原註趙謂子昂
吾即吾丘子行

挽臨海賀叔向

三點青山小海門風流賀老酒盈樽
潮生潮落鷗機靜雲去雲來龍氣昏
曾過四明尋舊宅忽驚孤棹返歸魂
故家喬木飄零盡尚幸詩書遺子孫

送顏寺丞回京

樓船使者持丹詔萬里天垂雨露低
海上風恬蛟鱓息江南水靜鷓鴣啼
兩年傳舍留旌節幾度連營聽鼓聲

掛席喜歸雙闕近
攄忠敷奏慰羣黎

挽徐伯敬

原註徐善錫刻虞伯生
作傳危太朴銘其墓

南州高士有徐君
藝苑才華蚤歲聞
天上玉樓誰作記
人間鐵筆更同文
風林不返悲魂夢
雨墨空遺舊策勲
尚想故人能掛劍
裏鷄絮酒奠新墳

次楊左丞詩韻二首

元戎戰馬來南服
自是車書混一家
雲合樓船清海岱
風生閭闔散煙霞
擢歌激烈悲笳鼓
劍血淋漓蝕土花

俘馘遠朝天萬里黃金為蓋玉為車

水陸齊攻黔寇穴山河恢復帝王家
三苗將帥扶淵日千里旌旗映海霞
楊子江頭風捲絮姑蘇城下浪飛花
欲知唇齒相依處倚角先須結輔車

餘姚海際阻風

飄風舟泊汝仇湖湖上新營立萬夫
鷗鷺寒煙生遠水牛羊落日下平蕪
邊防要足民兵食賦役兼行庸調租
惆悵干戈方四起餘生何地可樵蘇

寄張自南尚書

江山草莽鬪英雄，鋒火相尋萬里同。
吳楚東南連地圻，樓船上下與天通。
王師大捷先中夏，賢子猶懷建上公。
寄語乘槎持節使，好從淮甸過江東。

次金防禦越上韻

渡江風雨客奇哉，越上新詩馬上裁。
封禪千年秦望在，風流一曲鑑湖開。
嬌施已入吳宮去，太史曾探禹穴來。
更有何人識奇字，曹娥古碣鎖莓苔。

送鍾聲伯赴甬東書院山長

宋家天子尊師傅鄭相樓公理學傳湖上青山存禮樂
甬東華構祀儒先鄉人早立諸生館博士還無坐客羶
今日送君開絳帳杏花春雨聽歌弦

慈湖書院山長袁九萬滿任

春滿花香竹影間慈湖水長綠潺湲廟廷獨祀揚夫子
道學還宗陸象山博士寒無羶坐客諸生業已管窺斑
五兒豚犬慙籩豆珍重斯文受代還

送杜洲書院山長胡幼學之任

五磊雙峯秀色連新營精舍祀先賢紫陽夫子崇儀像
安定聞孫執豆籩泮水菁莪滋化雨芳洲杜若暖生煙
童蒙求我須知訓莫為時危廢簡編

題靜佳軒

浙東旬宣元帥安公節制台郡軍旅多暇志趣幽閒
作燕息之所取明道先生詩語榜之曰靜佳蓋當亂
離之頃四郊多壘鄰境豺狼羣動安公能嚴鎮雅俗

坐以制勝無事兵革庸非靜觀自得乎方緩帶輕裘
雅歌投壺把酒臨風橫槊賦詩茲又佳興之與人同
也遂為之賦

民物熙熙士卒諧元戎宴坐讀書齋飯疏飲水幽懷靜
挂笏看山爽氣佳柳色含煙青繫馬苔痕過雨綠侵堦
好因武備修文事還有奇勛勒巨崖

此若軒為東湖劉士賦

幽軒瀟灑傍湖濱何可一時無此君似有故人蒼玉佩

賸看稚子錦衣文涼生枕簟移青瑣影動鸞凰舞瑞雲
客至吟詩無別事煮茶燒筍對南薰

題松筠軒為上虞嚴恭初賦

夏蓋風煙神禹蹟柴門舊是子陵家蒼松隔水連筠篠
小屋如舟艤釣槎雨過商聲還激烈月明翠影自交加
漁樵來往堪招隱叢桂小山何足誇

寄題上虞陳九成夢軒詩

聞說太丘家世好弟兄怡樂奉親闈白雲覆地萱花老

愛日當軒華萼輝幾見成行鴻鴈過每懷急難脊鴿飛
上堂春酒齊稱壽堦下聯翩戲彩衣

天香室為定水寺復上人賦

瞿曇丈室小蓬萊誰送清香天上來金粟千鍾如藥擣
玉娥一夜竊奩開冰魂乍返蟾光滿露氣初凝鶴夢回
憶得前人詩句好曾揮兩袖步瑤臺

再賦天香室分韻得天字

金粟如來骨已仙清香還向月中傳衲僧結構蟾蜍窟

藥竈薰蒸腦麝煙斫樹何人持玉斧開奩無語對水田
却收萬斛歸方丈淨洗姮娥色界天

題東山寺報上人戒室

道人久住東山寺對客還傾北海尊紺室六時修白業
青燈一榻坐黃昏隴頭煙雨開窻戶門外松筠長子孫
共命頻伽何處鳥聽經來自給孤園

半山書隱為王熙陽賦

數椽茆屋住陂陀上有青山下澗阿花落硯池啼鳥靜

苔深磴級少人過讀書曾聽秋聲近拄頰時看雲氣多
莫使移文猿鶴怨長攀明月下松蘿

明白軒為大璞上人賦

教乘宗旨自天台衲子親承絕學來萬里銀河天似水
一輪寶月鏡非臺風飄時節旛應動春到園林花自開
大道坦然明白白何須此外惹塵埃

平江即事

江南景物不勝秋滿目塵沙暗虎丘海賦盡輸龍伯國

甕城深鎖闔廬州蒼茫樹色連淮甸隱約金精貫斗牛
忽喜天邊新鴈至遠將風露下滄洲

題雲間亭為衍慶寺士龍上人賦

雲聳奇峯冠海山山僧結屋在雲間松蘿棟宇聊堪賦
蜃鱷樓臺不可攀塵慮盡隨蒼狗化納身得侶白鷗閒
我來本是無心客拄頰看雲自往還

題南薰亭

水竹幽亭綠四圍南薰披拂漾晴暉五弦一鼓重華曲

萬化同歸阜物機自愛開窗多爽氣不勞揮扇却炎威
葛巾野服徜徉處好似雲壇樂詠歸

山輝軒為餘姚鄭元秉賦

江上峯巒照眼妍開軒況得近龍泉山因石潤清輝發
雲厭蒼蒼低秀色連砌下芝蘭溫似玉春深花木暖生煙
廣文舊日讀書地賸有遺光矚簡編

題舜舉獨馬圖

錢唐錢舜舉多作花竹卉木菓蔬而馬畫絕罕所見

一二耳豈亦如李龍眠善畫馬而黃龍心禪師謂其
後當生馬腹中遂不復畫馬而作羅漢人物耶客有
持以求筆語者為賦一詩云

畫史前生相馬身玉驄獨立最精神沙場百萬空回首
駉牝三千孰等倫金粟龍媒悲草木玉關驛路暗風塵
絕憐一日能千里誰是黃金買骨人

感事

海上蓬萊隔世塵秦皇漢武竟尋真蟠桃阿母三千歲

採藥靈童五百人
狼石金銀浮鴈鴛
茂陵風雨泣麒麟
長生別有軒轅術
大地能躋壽域春

青山槃野故宋鄭相讀書地也為劉隱君賦

鄭公相國舊鳴珂
百尺喬松掛薜蘿
已占青山為甲第
更分綠野考槃阿
夜深燈火書聲在
秋入郊墟爽氣多
重有幽人來結屋
門前萬頃白鷗波

時事

禮樂將興未百年
一時民物遽騷然
廟堂鼎鼐重調燮

海宇兵戈苦結連
寇盜不仁還掠地
君臣修德可回天
獨憐邊將相蹂躪
縱立奇勳莫自全

次東山寺報上人韻

僧中獨愛此郎賢
方外交從支許傳
茆屋新詩還可賦
竺乾妙典幾多篇
因尋放鶴林和靖
却值騎驢孟浩然
歲宴江空風雪滿
典衣沽酒莫論錢

次盛熙明為靈峯寺寫碣韻

晉帖唐碑已獨占
後來刻畫類無鹽
書成碧落人騎鶴

墨染烏絲露滴蟾彤管曾題金榜字銀鈎高映玉堂簾
解衣盤礴真能事倦後酣餘枕黑甜

又次前韻贈熙明

紫府丹臺籍已占謫居何事近魚鹽諫迎佛骨韓司馬
誤泄天機劉海蟾清夜乘鸞遊月府涼飈剪水作冰簾
風塵遍滿人間世却愛希夷睡正甜

次龍子高見貽韻二首

餘姚城頭啼夜烏餘姚城下水成湖霜落銜蘆初鴈過

月明失木窮猿呼干戈滿地憶朋舊道路蒙塵多賊奴
邂逅相逢又相別高懷慷慨休嗟吁

荒田落日噪飢鳥野水清妍似鑑湖媿我握符行有役
感君折簡故相呼題詩黃葉烏皮几飼馬青芻白飯奴
江海飄零今已久出門風雨又增吁

次盛熙明韻

自從海上覓神仙却喜山人夙有緣相訪每騎黃犢出
忘機曾對白鷗眠世間事與風塵會物外心同松栢堅

豈料中秋今夜月靈峯山下共談玄

送理問知事善積之赴都

君家弈世著恩袍幾見蓬瀛掣巨鰲父子相傳衣鉢舊
弟兄連占甲科高九重閭闔垂龍袞五色琅玕集鳳毛
喜向日邊來謁選笑從海上駕雲濤

送曹府知事高本中北上

五月樓船海上來高郎元是濟川才蓬萊咫尺神仙近
河漢參差星斗開三載策勛輸玉粒一朝步武上金臺

沙頭漫唱陽關曲坐向南薰酒滿罍

己亥元夕會禮部主事李宗道

幾年不作南宮夢今日俄逢禮部郎天上謫仙來太白
山陰道士愧知章良宵藜杖然金炬明月梅花對玉堂
一葉扁舟能共載又吹鐵笛過滄浪

送中書都事張道亨回京

翩翩天上張公子奉使曾乘八月槎海外何人傳羽檄
江南有客寄梅花孤舟詩卷輕行李萬里鄉關慘莫茹

北斗蒼蒼雙闕下為君回首望京華

送楊敬脩入京

楊郎丰骨與人殊落落才華美丈夫清廟闕宮瑚璉器
碧梧翠竹鳳凰雛干戈未定人千里風雨長吟宅一區
穩汎靈槎須犯斗莫教滄海有遺珠

送中政院同僉鈞納鳴謙回京

禮樂湮微復中興漢官還覩舊儀型一枝桂折蟾宮月
萬里槎浮使者星海上樓船吳檠白尊前風雨越山青

九重若問江南事為說干戈尚未寧

錢刑部牛繼志郎中回京

中郎持節下南州萬里江山道路脩昔日名魁龍虎榜
幾年春滿鳳麟洲已知攬轡清河洛不用乘槎犯斗牛
歸覲天顏承顧問好簪玉筆侍螭頭

餞兵部脫仲實郎中回京

中郎奉使出安邊萬里春風快著鞭道上驛程連斥堠
海頭蜃氣壓樓船雲霄雨露低雙闕草木烽煙已十年

歸步玉階須獻納江南早晚息戈鋌

四明應節婦張氏詩次馬編修韻

血淚痕深墓柏枯門前華表植雙扶孤飛黃鵠還將子
六袞蒼顏尚奉姑亂世死生同草木起家貞節自閭閻
華周有婦能移俗千載猶聞善哭夫

樂節婦

原註夫樂壽孫鄭之定海人因與鄉人聚觀驅離渡江溺死者十數輩皆不得

屍婦抱乳子沿流號泣數日欲與子俱沉俄而夫屍獨浮出遂歸歛葬婦年二十七事舅姑撫孤子紡績自給誓死不他今年五十矣有司請其事危太史為之傳旌其門閭焉

哭夫鄧婦類曹娥江水江花血淚多
乳子未堪霜露託鄉人爲輟歲時
憊寒雲重覆湘妃竹白鳥孤飛滄海波
太史能修貞節傳門前華表勒詩歌

海上寄金防禦

星馳羽檄下天台又督舟師海上來
虎豹旌旂拂河漢鯨鯢樓觀接蓬萊
一聲鐵笛雲雷動萬葉蒲帆風雨開
回首故人雙闕下招邀明月坐瓊臺

登樓

危樓百尺構憑虛中有幽人讀古書攬結多應山水秀
棲遲得似神仙居湖光展鏡涵青瑣雲氣如虹繞玉除
好倚闌干招李白九江何處是匡廬

巢雲詩

安定道人無屋住山中結構雲為巢市朝一片塵氛隔
世事幾番風雨交丹氣化為蒼狗去玄關時有野人敲
我來無覓深幽處但見長松舞翠蛟

丙申歲九月晦日自錢塘江放舟至廟山值風

閭淺且遇寇幾不免夜忽夢金甲神曰吾岱山之陳侯也來迎護爾須臾獲濟後舟至岱山果有陳將軍廟甚偉式符夢遂以牲醴祀之

江迴沙淺海舟膠脊浪掀騰風怒號星斗光沉和月黑
蛟龍氣吐值秋高赭山在望難回棹黃帽相逢出佩刀
恍忽惠徽神力祐試來古廟奠牲醪

為紹興錄事高文起題鏡湖秋色圖

參軍曾住蓬萊都厭見黃塵日走趨遮道少年騎竹馬

棄官何處無蓴鱸青鞋布襪若耶路紅蓼白蘋賀監湖
滿載酒船秋色裏風流一曲剡川圖

陪丞相宴西湖

南北兩峯青未了西湖一曲奈愁何玲瓏宮殿嘶戎馬
寂寞樓船掩翠娥紅錦水雲秋色老綠漪風露晚涼多
叨陪相府開恩宴喜報淮夷已倒戈

西湖行春

絲絲楊柳映蘓堤沙軟風和快馬蹄千里湖光春雨過

兩峯塔影夕陽低落花芳草西山路怪石眠松後澗溪
月下歸來人半醉滿城燈火鬧香泥

湖上書所見

沽酒樓前喚客遊朱簾半捲雨初收六橋春色花如畫
十里湖光翠欲流騷裊騎嘶楊柳岸玲瓏歌舞木蘭舟
誰家兒女多恩怨欲化紅蓮結並頭